


AHEPERI,

EKAPIITULU YA NENLI ³

 Kapiitulu 7, 8, 9, 10, okhuma vaavo, oh, wulu! Mukuxe elaapi anyu ni epaphelo, ni sothene, soolikana, maana kinnaamini wira Apwiya anoorowa onivaha okathi wooreerexa. Vano hiyo nri. . .

²¹⁸ Paulo onimunnuwiha ni omukhaliha, voopuroni, Pwiya Yesu. Vano, namaliha-ru yeela ohiy'ula, Ttiminku voosiisu. . . Okhala wira yinci-ene ya yeela enrowa olikana oratta-ene ni Mutthaka wa voosiisu, okhala wira enrowa okhala “ovalaanaha esabbath.” Owo mwaha muulupale eriyari y'Anasaapatu mahiku ala. Ni kaatthuna koolattuleni nyuwo othene wira murwe Ttiminku voosiisu. Tthiri, t'ivi enreerela, okokhorela, Esaapatu ahiiso Ttiminku? Bibilia onihimya exeeni ya yeeyo? Vano siiso nto, vakhala wira e. . . Eliivuru ila enivalaanaha ikano ni mahala, ni ennikhaliha khula emosa nipuro naya. aHeperi yaaleliwa sittharihiwaka ikano, ni Paulo aamwaahimeerya muteko mahala yaavanry'aya, ni ikano.

²¹⁹ Vano, nrowe nikuxe mulipiheryo mwaamukhaani vano. Ninoorowa otthika.

²²⁰ Etthu ekina, kookhalana iyookhola s'osoma-no. Khino kinoowerya. . . Vairaneya wira kino—kinoovonya ohiy'ula, kookhalana. Moosuwela kiri othene. . . sinikhaleela miyaakha miili wira kikhhalane miyaakha miloko mithanu, ni nkinooona ntoko soonak'aka, vakhiviru. Okathi woona waka. . . Kiroopacerya woona moolumo oottweelela, koono wira kaarowa okhala oohoona. Miyo khurwa omwaleiwa. Tothoro khwira, “Nnari. Munoomalaru ovikana miyaakha miloko mixexe, mwan'aka.” Ahe, owo khwira, kakhalaru mukumi voophiyerya, eyo pooti otthika tho, otthikela-tho woona vakhiviru. Owo khwira, “Vano, munniwerya omusoma Bibilia anyu mwairakameliha vale?”

²²¹ Miyo khwira, “Ayo.”

²²² Khwira, “Nuvira okathi vakhani, moonoo anyu khunrowa orakama voophiyerya.”

²²³ Vano nto miyo—miyo kinwehererya vano, mwa osoma weno, wira miyo. . . Bibilia ola mwaamukhaani a Collins ookhalana ileetera suulupale. Kinniweerya woona oratta-ene. Masi naphiya mapuro, maalupale oowiixerya memmo nrin'ahu okuxa Waataana wa Naanaano ni wa Khalayi, ni wiiwananiha. Kookhalana Scolfield mwaamukhaani. Ni nkireere omulimalala

Bibilia Scofield, sookweretha sawe. Nkinsoma sookweretha sa Scofield vano, okhala wira nkiniiraana ni Scofield mwa so—soowuupuwela sawe sinci-ene. Masi e—ennikisivela enamuna sithataanyiw'aya, okhala wira ti . . . kinnikhalanaka mwa okathi munci-ene, ni koosoma, ni vanci-ene, mpakha vansuwel'aka moota wo ophwanya mwah'aka.

224 Othene ola musya wa miyo, wo wiixuttiha, ni kahi wira ka mwiixuttihi vanci-ene. Masi, mukivilele vakhani, kinimooleelani Ekeekhai ntoko sinsuwel'aka Yeeyo, khula enamuna.

225 Vano, Eliivuru ila ti Paulo, muupuwele, owo aari . . . Owo aamphwanye sayi? Owo aari mwiixuttihi muulupale, opacerya wene, ahiiso musomi muulupale. Ni aahixuttihiwa mwa Waataana Wa Khalayi. Ookhala onwerya okileela vano ti pani omuphwanny'ahu wira t'ari mwiixuttihi awe? [Muthukumano oniira, "Kamaliyeli."—Mol.] Kamaliyeli, mmosa w'alipa-ooxuttiha oosuwanyeya a mahiku ale. Vano nto Paulo, ninnoona wira, nihiku nimosa . . .

226 Owo ahinatthi wihaniwa *Paulo*, ookhala onwerya okileela nle naari nsina nawe? [Muthukumano oniira, "Saulo."—Mol.] Saulo. Ni owo aari mukhulupale muulupale oYerusalemu, mukhulupale a etiini. Ni owo aakhumelenle ntoko mu—mutthu ooxuttihiwa, etiini saana. Owo aaniwerya olavula mattaava maxexe wala mathanu oovirikana, mulopwana mmosa oosuwela saana. Ahe, osoma wawe ni osuwela wawe waahimukhaliherya? Nnari. Owo ohimye wira aahaana oliyala sothene aasuwel'awe, wira amusuwele Kristu.

227 Tivo ninnoona, nto, wira khonthuneya mutthu oosuwela wala oosoma. Ontthuneya mu—mutthu ontthuna wiiyeviha oohoolo wa Muluku, voohicala moota xeeni.

228 Mwaahisuwela wira Dwight Moody aari oohisoma mpakha, voohithepya, ilepelo sawe saari—saary'aya sooveyaxa kihinsuwel'aka ntoko exeeni. Saahaana oreheriwa mitthaka sawe, okathi wothene. Owo—owo aari namalepa voohireera, ootepa ohisoma.

229 Mwaahisuwela wira Petru ni Yohani, a mBibiliani, yaari oohisuwelasa etthu mpakha vahaasuwel'aya hata olepa nsina naya, ni khiyaarowa osuwela nry'ene oohoolo waya? Murummwa Petru, yoowo aarina ihulelo sa Momweneni, khaarowa osuwela nsina nawe nilempwe-ene oohoolo wawe. Nkuupuwelani yeeyo. Bibilia ohimye, wira, "Owo aari oohisuwela etthu ni oohisoma." Tivo, eyo ennivaha ororomela. Amen. Ayo, mulopwana. Eyo eniiraneya, wira yooniherye wira Muluku aaniwerya omwiiriha yeeyo mutthu.

230 Vano, ni ninnoona wira, Paulo amalakaru okhalana musuwelelo muulupale. . . Miyo kintthuna kookoheni. Onkhala musuwelelo orwa wa Kristu? Atthu othene aakhalana

musuwelelo? [Muthukumano oniira, “Ayo.”—Mol.] Ayo, mulopwana. Ayo, mulopwana. Onkhala Oyariwaa. Owo musuwelelo. Nto vano naahikhala Mukoleexiyu emosa Luteraano, woohikhala khalayi. . .

231 Kaahireeriwa oxekuw’ola, kaahipisa, kaahaana okhala iwe ewoora ya namuloko ni piili, wira kalye ni—ni Tom Haire. Akavi atonko wiiwa sa, natoropa mmosa oosuweliwa, a mavekelo mwIrlanta? Ni owo onnikhalaka ni Munna Epp ola, mprokramani mwawe, ni wiisooniherya nno mapuro manci-ene wAmerika. Nto kaalya ni yoowo olelo. Ni hiyo naari. . . Miyo kaahipisa ntoko iwoora tthaaru. Yaari ntoko iwoora tthaaru ni minuutu miloko miraru, sihalaka muloko ni mithanu wira ephiye iwoora xexe, okathi olyiyy’ahu. Masi sothene saari saana. Ni naalavula mwaha wa itthu seiya, sa moota Yesu Kristu okhanly’awe Muru wa itthu sothene.

232 Vano, okathi Paulo osuwenly’awe yeela, owo aahikhalana musuwelelo. Vano nto owo ahinatthi okupali musuwelelo ola, waahaana olikana ni Bibilia. Ni ninnoona wira owo—wira owo aahikhuma khurowa elapo ekina, nto weiwo khukhala miyaakha miraru, asomaka oratta-ene Soolempwa, wira oone vakhala wira musuwelelo awe waari woolikana.

233 Vano, ninnoona wira owo aahikhalana etthu yuulupale wira oonanane. Owo aahaana otthika ni ohimeerya ekerej’awe, atthu othene, wira itthu sene seiyo owo aalupantth’awe saari soolikana.

234 Mwaahinto okhala oowiira etthu ntoko yeeyo? Vekeekhai, ntoko othene, okhalana otthika ni wira, “Atthu ale nawiihan’ahu ‘masantu oophirikeya,’ kiroophwanya wira, awo yaahikhalana exariya.” Munnona? Ti yeeyo. Hiyo naahaana orukunuwa. Nto itthu saatonko ahu onyokha, vano ninniphenta. Iwo orukunxa murima, etthu yootikiniha, yootikiniha.

235 Vano, kaahihimya nuulumo nlo, “santu oophirikeya.” Khekhanle etthu ene eyo. Khekhanle etthu ene eyo. Masi, awo aniwiihana atthu siiso, atthu a mowaaryani. Masi khakhanle hata masantu oophirikeya. Khekhanle etthu ene eyo. Khekhanle hata etthu elempwe ya ekereja etonko orepheliwa siiso, ntoko sinsuwel’aka, wa miromolelo ekonto emosa ni imiya thanu namosa n’itthu, soohiya-hiyana. Khokhanle hata muromolelo mmosa onihaniwa santu oophirikeya. Nlo paahi nsi—nsina xetwani ovahaly’awe Ekereja.

236 Masi awo yaaniwiihana, mahiku ale. . . Akavi answela etthu yaawiihanak’aya mahiku a Paulo? Owiivalaanya. Moosuwela etthu enihimya *owiivalaanya*? “Mulolo.” Awo atthu alolo. Tivo, voohilekela kinimwiihaniwa “santu oophirikeya” ntoko “owiivalaanya.” Ankhi nyuwo? Tivo vakhala wira awo—vakhala wira awo yiihaniwa siiso, nave yaanittteeliwa murima!

Ni exeeni Yesu onihimenry'awe wira niireke mwaha wa yeeyo? Owo ohimnye wira, "Mutteeliweke murima, ni mutthapeke vowaatta; okhala wira otthuveliwa wanyu wuulupale Wirimu, tthiri ti siiso yaalupantth'aya maprofeta nyuwo muhinatthi." Awo yaahiira.

²³⁷ Ohimnye wira, "Nikhaleke ootteeleliwa murima vanci-ene." Etthu p'itthu *vowaatta* ti "yookhalihwiwa osulu," otthapa saana. Nto awiixutti, okathi waaphwanyiw'aya oophwanela ovilela oveehiwa wa Nsina na Yesu, awo yaahitteleliwa murima ni otthapa wuulupale mwaha wo owerya ovilela oveehiwa wa Nsina Nawe.

²³⁸ Nto olelo, atthu anci-ene olelo, vaairaneyya awo wiianiwa santu oophirikeya, awo yaamuvolola, "Wulu! Khino kaahivonya, opacerya wene."

Masi awo yaanitthapa mwaha wa yeeyo, "Oh, wulu, ovilela Nsina!"

²³⁹ Nto vano, eseeuku ya nenli, awo yaawiihana "*mwiikimanyo-ottuli*." Owo okathi aKristu yaakuxak'aya mwiikimanyo ottuli waya, wira yooniherye wira yaahikhomeliwa vamosa ni Kristu. Awo yaawiihana *mwiikimanyo-ottuli*. Vano koosuwela wira akatolika anniisiihana siiso, masi eyo khiyaari ekereja Katolika. Yaari ekereja Prustante ehinatthi wiianiwa ekereja Prustante. Eyo khiyaakhoottale etthu ekina woohikhala etampi. Etthu eniihaneliw'aya ekereja Prustante olelo okhala wira yaakhoottale ma—makano a eKatolika. Masi eyo e...Eyo, nlelo, eyo khiyaari muromolelo okathi uwo, okathi yiianiwiw'aya *mwiikimanyo-ottuli*.

²⁴⁰ Mphwanye ihantisi sa Josephus paahi ni anamalepa akina, ni *Apapilooniya Anli* sa Hislop, ni sikina, nto munoophwanya wira ti siiso, wira awo khiyaari ekereja. Ekereja yoopacerya yoothhokihiwa, yaatonko okhala, yaari ekereja Katolika, miyaakha soophiyaka imiya tthaaru, numala a—arummwa ookiserya. Miyaakha soophiyaka imiya tthaaru ohoolo waya, ekereja Katolika yaahitthokihiwa. Nto olupatthiwa khupacerya, ni khwaakhanyererya atthu okela ekereja Katolika, nto awo yaarina ekereja ni estaatu, so wiiraana.

²⁴¹ Eyo yaari numala, ele yiianiwa, orukunxa murima wa Kostantino, okhuma epakawu okela mw'Ekatolika. Masi, akhala mutthu otonko osoma ehantisi ila, owo khaarukunxale murima, itthu siiraly'awe. Oh, wulu! Etthu ene emosa owo iiraly'awe ya etiini waari ohela mwiikimanyo okereja Sofia Oowaarya. Eyo t'itthu ene emosa owo aatonkw'awe wira, ekhalaka ntoko mwiirelo wa etiini. Owo aari o—ootakhala. Masi awo yiianiwa orukunxa wa—wawe murima. Ohinreere olikana n'ile eniihaniwa orukunxa murima olelo.

242 Vano, masi, ninnoona wira, okathi Paulo orukunxaly'awe murima khukhalana musuwelelo ola w'ekeekhai, owo aahirukunuwa voomalela.

Nto, moosuwela, *orukunxa murima* enihimya "orukunuwa." Nyuwo munrowa ephiro *ela*, nto khurukunuwa murowaka ephiro *ela* nno. Ayo, mulopwana. Onkhala orukunuwa, otthika.

243 Nto Paulo, amalaka-ru orukunxa murima, owo ahinatthi okhalana musuwelelo ola . . . Vano, owo aahikhalana musuwelelo wooreerexa.

Vano, kookupali wira, okathi onimukupaly'anyu Kristu, okhala Moopoli anyu, owo musuwelelo. Kinnaamini, otthapa wo osuwela wira itampi sanyu sooleveleliwa, eyo ennihakalaliha murim'anyu, voohihyererya.

244 Masi nto okathi Eroho Yowarya yooreerhiwa enkhuruw'aya, owo musuwelelo, Oyariwa iwe vasya, muhinrow'anyu okhalakhala muliyalaka. Munkhala Mwaana a Muluku. Nto va t'ile eniir'aya.

"Munsuwela sayi, Munna Branham?"

245 Vano, ala masomi ooxuttiha. Atthu anci-ene, aMetotista, aneererya wira, "Awo yaahikhuwela okathi waakhenly'aya Eyo." Ahe, eyo ti yooreera. Mwakhalana vale, khukhuwela, vaareera. Okhala wira mwaahikhuwela, khiyaari ethoonyeryo wira mwaahikhalana, okhala wira anci-ene yaahikhuwela nave khiyaarina Eyo.

246 aPentekosite yiirale, "Okathi yaalavunly'aya ilavulelo. Awo yaahikhalana Eyo." Eyo ti yoolikana. Nyuwo mwalavula ilavulelo, khukhalana, ti yoolikana. Masi mwaamuwerya olavula ilavulelo nave nlelo khuhikhalana. Nto?

247 Tivo, moone, mwa sothene, onkhala musuwelelo w'ovira mookhwaani khuphwanya Ekumi; okathi itthu sothene sa khalayi sinkhw'aya, ni itthu sothene sinkhal'aya isya. Kristu onkhala eekeekhai. Itthu sa khalayi sinoomora, mitathaari sa khalayi sa itthu s'erutthu. Munnisuwela moota wo othipa mutathaari wira mphele? Naanikuxaka ehipa n'ukeliha vathi, n'uthipa mpakha ohikhala hata nipattuuxa naahala. Nto awo aahimyasa wira, "Wakhalaru mutathaari woowaawa oniphuwa mwa nyuwo, mphele-mo." Ti yeeyo. Nto ti yeeyo Eroho Yowarya eniir'aya, enoophela mitathaari sothene. Enoothipula. Khuthukumanya; khupaha. Enimwiikumihia seiyo. Munookhalana soohepha sooreera nto, naira-ru siiso.

248 Vano, Paulo aahisuwela wira yookhala yaakhumelenle, tivo owo aahitthikela wArapiya, nto weiwo owo aahaasoma miyaakha miraru maprofeta othene a Waataana Wa Khalayi, moota awo yaalaleeryans'aya. Ni owo aahiphiyerya osuwela wira Eyo yaari Ekeekhai mara.

249 Vano, mulikanyihe yeeyo n'ulelo, moone, mwa musuwelelo ola hiyo waarin'ahu va ekerej'ela yaamukhaani: ya Ettheneeri y'Oxaka yaakhumlenle iwe, Waarya iwe wuulupale waakhurunwe, waarowa ohimya khalayi ene ni wooniha itthu saarowa okhumelela. Moosuwela, eyo ti yooreerexa. Masi munn'aka aarumeela khukileela wira, "Eyo yaari ya xetwani." Nto miyo—miyo nkaawerya osuwela saana.

250 Tivo, miyo nkaahimyale hat'etthu ya yeeyo mpakha ohiyu omosa, waakhanly'aya musuwelelo mmosa waakhumelenle oGreen's Mill, Indiana, okathi Nlaikha n'Apwiya naaviraly'aya neettaka khweemela vale, khoodherya ni Yoolempwa. Vano khuvarela mooro. Nto khupacerya orowa.

251 Nto Ettiminku ila evinre paahi, naahoono eyooniheryo yoohivonya ya Yesu Kristu, Yoowo onwerya omukuxa mutthu aheetta, ni aha . . . Mutik'awe wa olipa-lipa waakhwiye, okathi aMayo ni matothoro oosuwelela yiiraly'aya, "Woomalamala, khuluwi." Nto ory'ene oohoono; aahivenya khukhumela vate, asukhumaka ekhater'awe ya iroota akhuruwelaka ixikatta, aaniwerya weetta ni wooka ntoko mutthu mukina. Eyo ennooniherya wira iwo owerya wa Pwiya Yesu ohihimunwe. Eyo vo. Owo mmosaru nsana, olelo, ni mahiku othene.

252 Vano hiyo khanihiyo nikhuru n'otthapa ohiy'ula, osuwela wira Muluku oolipiherya musuwelelo ola muulupale orin'ahu, wira olikanyihiwe ni Bibilia Awe ni n'anatiri? Tivo hiyo nihaana otthapa vowaatta. Ni ninnoono nto, wira ekapiitulu 2, noophwanyana wira, "Nihihyeke itthu iya . . . Nihinyoonyeriweke itthu iya." Nihaana ovarela saana itthu iyo.

*Nto ninrowa otthyawa sayi, naanyoonyeriwaka
woopowa iwo wuulupale; . . .*

253 Ninrowa wira exeeni, nitrine-ene Masu a Muluku, okathi onrow'ahu weemela Opwaro Woolamuliwa? Khamunrowa owerya wira, "Miyo nkaasuwela ela." Oh, ayo, mwaanisuwela. "Ahe, vano, Munna Branham khino aamwiira ovonnye-ene." Eyo ekeekhaii. Masi Muluku khonvonya. Masu Awe khanvonya. Nto muupuwele tu, etthu emosaru, Bibilia, otonko okhala mw'arummwa, onookhala-tho. Oh, nttottopeliwe Nsina n'Apwiya!

254 Kuupuwelaka wira kirina miyaakha miloko mixexe ni mithanu na miraru, kikhuveelaka miloko mithanu, ni mahiku eemiravo aka aavira, ni sikina; osuwela wira okhuma mwanamwane kaahikhalana Natiri ula ooreerihiwa, ni kihaalaleerya axinn'aka alopwana n'athiyana; ni v'eekeekhai owoona ikonto sene w'ale akhumme mw'epiphini, osuwela wira ninrowa Etthoko ahu Yoohimala, wa ole oottottopeliwa. "Nto emp'ela ya vathi va yakurumuwa vale," kihinatthi omaliha olaleya, "yookhala emosa iwe ennipelele." Aleluya! Osuwela wira aakhala atthu ituusiya sene akilanthe va, yaawo, awo

yahiya ekumi ila naanaano va; nihinatthi owerya oroiha erutthu aya wa mulipa a miteko soovitha, awo yaamukhala mw'erutthuni mme yoovuwa iwe, etthapaka n'ale oowaarya a Muluku, ery'ene Ohoolo wa Muluku, wira ekhaleke voohimala. Ni mulipiheryo, w'ekeekhai ni voomalela wira ti siiso! Amen.

²⁵⁵ Oh, eyo yaamuwiiriha aPrespiteriyaano okhuwela! Yaahiireya Ttiminku, kahi siiso? [Muthukumano oniira, "Amen."—Mol.] Atthu ale yaari aPrespiteriyaano. Vekeekhai yaamwiira, wuupuwela. Oh, khivanxankiha atthu okhalaka oohakalala! Vano, mwaakhalaka oohakalala mwaha wo ommana poola wala omuhela mmosa mukaaphuni, vaatepaxa wookhalihani oohakalala osuwela wira moovira mookhwaani khuphwanya Ekumi, wira nyuwo mwa Yoopattuxiwa esya mwa Kristu! Moosuwela mwa enamuna erooho anyu eniweettihery'ayani ottaiwene wa sootakhala, ni wootha, ni owanani, ni itthu sothene sa molumwenkuni. Ni murim'anyu onkhala onlukam'aya wa Kristu. Awo ti mawoko anyu. Eyo ti yothene enuupuwel'anyu mmuruni mwanyu, vamura mani vanyu, othana wothene n'uhiyu. Mwaarowaka wumpaathi ohiyu, n'uhela matat'anyu ottuli wanyu, ntoko sa, ni wumpaathi vale paahi ni omuttottopela Yoowo mpakha orupa. Ovenya, voosiisu, nlelo mmuttotopeleka Yoowo. Amen. Oh, wulu!

²⁵⁶ Miyo kinnikhalaka kimuttottopelaka Yoowo. Voosiisu, ninniiraka nivennye ntoko ewoora ya neexexe, Munna Wood ni miyo, nirowaka oxaaka voosiisu, orowa oxaya ikhopa. Miyo kinnimuttottopela Owo mukhitte mwa khula mwiri, kookupali, kiniphiy'aka-vo. Nkinwerya woona mwiri, kuhimuttottopela Yoowo. Muupuwele, Owo t'onnuwihale mwiri ule. Omoona nasope mwaamukhaani ovava; Owo onnimusuwela nasope owo. "Oh," nyuwo muniira, "ethiru Munna Bill." Oh, nnari, kehiyo. Owo onnisuwela nipuro eri khula ekhopa. Owo onnisuwela nipuro vari khula nikuruthu.

²⁵⁷ Vano, emaara emosa, Owo aaniphavela musurukhu, nto Owo khwira, "Petru, yookhala ehopa, okathi vakhani ovinre, eminrye musurukhu wa maluku, yoowo ene, hiyo nimphavel'ahu. Murowe mwamurihele coolo. Miyo kinooveleeliha weiwo. Mwakumihe musurukh'uwo mwaano mwaya, okhala wira eyo khekhanle orumeelaka, mmansaya. Murowe mwamulive ya namuloko ahu ni mpoosito." Amen.

²⁵⁸ Nto isumana vakhani sivinre, kaahoona ehopa yaamukhaani yaakhwiye, ery'ene mmaasini. Nyuwo othene moomwiiwa wahala ene. Vale ori Munna Wood, ni muhim'awe n'akina wira ekhalele oxaahiti. Ehopa ele yaamukhaani ery'ene yookhwa mwa ewoora nuusu, vamaasini, ni marupo aya ekhumme-ene mwaano mwaya. Vano Eroho Yowarya yuulupale yaahikhuruwa, Eyo yaamanly'aya ohimya, nsana naya wira, "Munoorowa woona ohihimuwa wa mwaaxinama mmosa." Nto voosiisu

aya, okathi vakhani nikhumakaru nsuwa, naahoona ehopa yaamukhaani, khiyaari yoorekamaxa so. Okathi ekhuruwaly'aya Eroho y'Apwiya, khwira, "Ehopa yaamukhaani, Yesu Kristu onnoopenuxa." Nto ehopa ela yookhwa, yaahikhala ephempaka vasulu va maasi ewoora nuusu, khutthikela okumi khurowa ekataka yiilipihaka ntoko saawery'aya. Oh, nttottopeliwe Nsina n'Apwiya. Moota Awo ary'aya oothamaleya!

²⁵⁹ Khivanxankiha Paulo aawery'awe ohimya, wira, "Owo aalikana ni Melikisetekhi." Owo aari Melikisetekhi. "Melikisetekhi khaarina epacerelo ya mahiku. Owo khaarina emalelo ya miyaakha. Owo kharina epacerelo y'ekumi wala emalelo mwa ekumi. Owo khaarina tiith'awe nnakhala maam'awe." Tivo, Owo khaakhanle okhalaka mukina. Hata wira Owo aari pani, Owo mukumi nlelo ohiy'ula. Vano, eri enamuna emosa paahi y'Ekumi Ehinimala, nto eyo ti ya Muluku.

²⁶⁰ Nsana ohiyu okathi waavaanyihan'ahu, munna mmosa khaawerya osuwela saana oraaru wa Muluku, ni moota waalavul'ahu yeeyo. Moota Yesu eemenly'awe vale, Mutthu, a miyaakha soophiyaka miloko miraru. Nto Owo khwira. . .

Awo yiirale, "Oh, axitiith'ahu yaahilya emana mothakoni."

²⁶¹ Owo khwira, "Vano awo, ahookhwa, othene aya." Masi Owo khwira, "Miyu ka Yoolya y'Ekumi kikhumme wa Muluku a Wirimu, mutthu only'awe khuhikhwa."

²⁶² "Oh," awo khwira, "axitiith'ihu yaahiwurya Vamwala mothakoni."

²⁶³ Owo khwira, "Miyu ki Mwala Yoole." Mutthu a miyaakha miloko miraru. Khwira, "Abrahamu aahitteeliwa murima voonaly'awe nihiku Naka."

²⁶⁴ "Vano," khwira, "vano Nyuwo muntthuna ohimya wira mwa muulupale ntoko Abrahamu, nave Nyuwo khamurina miyaakha miloko mithanu nlelo, ni muntthuna ohimya wira Nyuwo moomoona Abrahamu yoowo okhwiye mwa miyaakha imiya thanu na tthaaru? Hiyo noosuwela wira Nyuwo murina munepa wootakhala vano. Nyuwo mwa mulolo." Ti yeeyo e. . . Ti yeeyo *xetwani* enihimy'aya, "mutthu oovahuwa." Khwira, "Nyuwo murina munepa wootakhala, ni mwa namukhw'anepa."

²⁶⁵ Owo khwira, "Abrahamu ahinatthi okhala, MIYO KÒKHALA."

²⁶⁶ Ti yeeyo owo aary'awe. Owo khaari mutthu pure paahi, nnakhala khaari profeta. Owo aari Mulukuu, Muluku akhalaka elapo ya vathi mw'erutthuni yiianiwa "Yesu," mwa—Mwaana a Muluku owiipaka erutthu. Ti yeeyo Owo aary'awe.

²⁶⁷ Vano, hiyo ninnimuphwanya Owo va, wira mwa epantte yookiserya vano, wookiseryani wa ekapiitulu 2, vaavo katthun'aka ophiya-vo, opacerya versiikulu 16, ahiiso versiikulu 15.

*Ni wira awoopole ale . . . mwaha wo woova okhwa—
okhwa okathi wothene yaari mw'epothhani.*

Ti yeeyo ohimaly'awe wira Yesu ohiira, wira Owo aarwenle owoopola awo mw'epothhani, yaawo yaari oowoova okhwa okathi wothene w'ekumi aya.

²⁶⁸ Vano khivantthuneya woova okhwa. Vano, tthiri, hiyo ninnoova; hiyo, khaavo mmosa a hiyo onthuna, ele eniihan'ahu, *okhwa*. Masi moosuwela wira mutthu ayariwaru vasya khankhwa? [Muthukumano oniira, "Amen."—Mol.] Vanweryaneya sayi owo okhalana Ekumi Ehinimala vano nto khunakhwa? Khokhanle wiiraka. Etthu ene emosa tu ekhane okhwa, nuulumo *okhwa*, nnihimya "ovalaana." Vano owo onoovalaana okhuma wiitho wahu. Masi owo onkhala Ohoolo wa Muluku okathi wothene, ni kweekwe onookhala. Tivo, okhwa kuhiyo etthu yoolipa. Okhwa etthu ya nttittimiho. Okhwa t'unnirowana Ohoolo wa Muluku.

²⁶⁹ Masi vano, vekeekhai, hiyo, nry'ene atthu, nineetta, muhina wa itthu iya sooriipela nno, hiyo—hiyo khaninsuwela saana ntoko saatthuney'aya. Ni, vekeekhai, iwereyelo soottiya iphumo sa mookhwaani saarw'aka, sinnimwiiriha ole oowaaryaxa a hiyo woova ni otthikela otuli. Eyo yaahimwiiriha Mwaana a Muluku wira, "Vaamuweryaneya ekoopfo ela okivira?" Eyo etthu yoowoopiha. Muhiiwe voovonyeya. Okhala wira hiyo . . . Eyo ehukhumu y'etampi, okhwa tury'aya, nto ohaana okhala woowoopiha.

Masi naweryaru oweha epantte ekina y'ekuwo, iwe, ti weiwo ery'aya. Attotopeliwe Apwiya! Epantte ekina y'ekuwo, ti weiwo mutthu onthun'awe oweha-wo ohiy'ula. Anna Mae Snelling mwaamukhaani n'akina yaaniipaka nsipo nimosi va, "Pwiya, Mukitthuniheye Kiwehe Epantte Ekina y'Ekuwo y'Okathi." Atthu othene annitthuna woona yeeyo.

²⁷⁰ Vano, vano hiyo va, versiikulu 16. "Tthiri vekeekhai Owo ookuxa . . ."

*Tthiri owo khokuxale, mwa yoowo malaikha; masi
okuxale osuulu w'Abrahamu.*

²⁷¹ Oh, ninthuna neemele-tho vaavo vano. Vano nihanle okela . . . Okhala wira, epantte yoopacerya y'ekapiitulu 3 ila, epantte aya yookiserya, emmalela mwa "nihiku nenlo na esaapatu," wa Ettiminku ila enrwa.

²⁷² Vano nwehe.

. . . owo khokuxale . . . mukhalelo wa malaikha; . . .

Vano, ti pani "Owo," owo onimuhimy'awe? Kristu. Kristu ti Pani? Muluku, Logos ya Muluku.

²⁷³ Vano mukihye kileeliherye-tho yeela, wira moone saana. Muluku kahiyo aMuluku araru. Oraaru wa Muluku ori

Mmosa. Tithi, Mwaana, Eroho Yowarya, khenihimya wira ari aMuluku araru oovirikana. Vakhala siiso, naamukhala apakawu. Mwaha wa yeeyo aYuta ahinwery'aya osuwela saana. Eyo khenaxuttihaweke mBibiliani. Vano, eniixuttihwa okereja Katolika, mara, ti weiwo opatiiso wa oraaru okhummy'aya-wo.

²⁷⁴ wAfrika awo anoopatisani vaara vararu nwehaka ohoolo: vamosa ya Muluku Tithi; vamosa ya Muluku Mwaana; vamosa ya Muluku Eroho Yowarya. Vano, eyo ti yoovonyeya. Khasivo miixuttiho sene sa yeeyo mBibiliani. Munnona?

²⁷⁵ Nto vano, eyo—eyo t'inamuna awo yiixuttihaly'aya. Eyo khurwa mpakha Lutero; okhuma wa Lutero, wa Wesley; erowaka siiso muhina m'okathi oviraka. Masi khenakhaleke mmwiixuttihoni mwa Bibilia. Kweekwe enikhalka yoovonyeya, okhuma okathi epaceny'aya.

²⁷⁶ Vano, nto, Muluku aari wopaceryani. Ohinatthi okhala hata okokola, ohinatthi okhala hata aatomu, ehinatthi okhala hata ettheneeri, ehinatthi okhala hata etthu yowooneya, Muluku aanisarya ephaka yothene. Nto mwa yeeyo khiyaakhanle etthu woohikhala: oloka, mphento, owaarya wooloka, exariya yooloka. Yaari Eroho. Owo aanikhuneela ephaka yothene okhuma W'ohimala, weiwo ohinwery'ahu wupuwelelaka-Wo. Eyo enoorowa ovikana etthu p'itthu naakhanly'ahu wupuwelelaka.

²⁷⁷ Ntoko mwa eteleskoopiyu ile, naamuwerya woona mi—miyaakha imilyawu emiya n'itthu sa ephaka wa waarya. Nkuupuwelani yeeyo. Miyaakha imilyawu emiya sa ephaka wa waarya. Nto waarya—waarya oneetta voophiyaka ikilomo ikonto muloko ni piili ni imiya thanu na tthaaru ni miloko mithanu na miraru khula esekuntu. Ni miyaakha imilyawu emiya sa ephaka wa waarya. . . Muupuwele paahi imilyawu kavi sa imiilya saarowa okhala. Khimwaarowa owerya waalikela. Khamunwerya okuxa eliinya ya ithanu na xexe n'umurukurerya Jeffersonville, nave nlelo khimwaarowa okhalana yookawanyeya mwa imiilya sa imiilya. Muupuwele yeeyo. Ni ovikana yeeyo nlelo sookhala ittheneeri ni iplaneeta. Nto Muluku, sihinatthi hata emosa wa seiyo okhala, Owo aahikhala. Munnona?

²⁷⁸ Nto vano Logos yaakhumme wa Muluku, yeeyo yaari e—Logos, yothene ela khupacerya opaka mu—mukhalelo w'erutthu. Nto erutthu ila yihaniwa, mwa oxuttiha w'ale oosoma, Logos, Logos yaakhumme wa Muluku. Mwa moolumo makina, nu—nuulumo nooreerela yeeyo, yaari ele eniihan'ahu teyofaniya. (Teyofaniya erutthu ya mutthu evuwihawe.) Kahi voolikana ni erutthu n'iphome ntoko saarow'aya okhala mwa mukhalelo aya w'ovuwihawa, masi muthinto w'erutthu ya mutthu ehinilya, nnakhala ehiniwurya, masi eyo—eyo erutthuu, erutthu ennipelela hiyo nimalaka-ru ohiya ela. Vano, iwe, hiyo ninkela mw'erutthuni memmo. Ni owo ti muthinto w'erutthu

Muluku aary'awe, maana Owo iirale, "Nrowe nimpake mutthu onlikana ni hiyo ni oolattana ni hiyo."

²⁷⁹ Vano, mutthu vakhanly'awe erutthu iyo, owo aaneetiha ihopa sothene, n'axipalame, ni—ni inama sa mutakhwani. "Vano nto khaakhanle hata mutthu wira alimeke etthaya," Maphattuwelo 2. Owo aapanke mulopwana ni muthiyana, masi khaakhanle mutthu wira alimeke etthaya.

Vano Muluku aahimpaka mutthu vatthayani v'elapo ya vathi. Owo aahinvaha ntata ntoko e—ntoko khole. Owo aahinvaha nnawu ntoko ekhaya. Owo khunvaha, Owo aampanke, ailattanihaka. Nto erutthu ila ya vathi va enlattana ni ekumi y'axinama, ni empakiwa ni etthu emosaru. Erutthu anyu epakiwe voolikana muthinto mmosaru wa etthu ntoko ekhavalu, wala mwalopwa, wala etthu p'itthu siiso. Epakiwe ni ekalsiyu, potaasiyu, patarooya, waarya wa olumwenku. Nyuwo khamuhiyo paahi. . . Irutthu sothene ntoko eyo kehiyo erutthu emosaru; erutthu yoovirikana, masi epakiwe ni etthaya ya elapo ya vathi vaavo eyo ekhummy'aya-vo.

Masi, evirikanelo ya mwaaxinama ni mutthu, Muluku oroohele munepa mwa mutthu, nave Owo khohenle mwa mwaxinama. Okhala wira, munepa waari mwa mutthu ti eteyofaniya yeeyo.

Oh, miyo—miyo, nkiniphiyerya-tho ni. . . nla, masi kihaana ophiyerya nenla.

²⁸⁰ Nkawehani. Khamunuupuwela okathi Petru aary'awe mukhatteya, nto Nlaikha n'Apwiya khurwa khuhula mikhora?

²⁸¹ Hiyo naarowa opasari yuulupale nno, nihiku nlo, vano mukhora khuhuleya ohoolo wahu. Miyo khwira, "Moosuwela, Bibilia t'apacenrye okhalana eyo." Munnona? Vano, mukhora, oniihula, mmansaya.

²⁸² Nto okathi Petru okhumaly'awe, eettaka v'alipa-oolipelela mikhora ala, awo khiyaamoona owo. Owo ahimuvira namalipelela a mpaani, namalipelela a vate, khukhumela vaniyateni, attharaka exiri, mpakha mphironi. Ni khaavo hata mmosa a awo aasuwenle wira aari pani. Ni hata khiyaaca. . . Yoona wira aari mulipa-olipelela mukina wala etthu. Awo. . . Owo aaroovira tu, nto mukhora khuhuleya mmansaya, okathi waakhum'awe, n'uwareya ottuli wawe. Nto vaphiyaly'awe vate, owo oona wira aamuloha. Vano owo aahirowa owannyawe Yohani Marku, weiwo waarin'aya muthukumano wa mavekelo. Nto owo aamana. . . [Munna Branham ommana vapulpitu. Nipuro vahiitthu mufiitani—Mol.] . . . wira okhale eriyari aya.

²⁸³ Oh, Owo t'ovuwxexa. Owo t'othamaleya.

Vano, oh, owo khaakhalihwe mwa mukhalelo wa nlaikha; masi aakuxale. . . osuulu w'Abrahamu. Muluku aikhalinhe osuulu w'Abrahamu.

²⁸⁴ Vano, naakhalanne okathi, wo otthika ni wooniherya moota Owo iraly'awe moWaataanani! Nyuwo mookiiwa miyo olaleya eyo, imaara sinci-ene, moota owo aakuxaly'awe axinama ale khwaathikilasa eriyari, khuhela-mo nsiya n'ipompa. Vano owo khuweha, nto khoona mwiixi vakhani, owereya wooriipela, okhwa. Numala, ehimye yaatthuwa mwiixi, omooroni. Masi, ohoolo waya, waanirowa Waarya vakhani wootteela. Nto otteela iwo vakhani waahivira mwa khula nipattuuxa na mukuttho ole woothikilasiwa, wooniheryaka ele Owo aarow'awe wira. Vano Owo aahilapha, nto vairaly'awe siiso, nto aahilepa Waataana, oniiheryaka etthu Owo aarow'awe wira.

²⁸⁵ Nto Owo, Yesu Kristu, aahirwa elapo ya vathi; Muluku, *Emanuweli*, "Muluku mw'erutthu." Nto oKalvario, Owo aahithikilasiwa. Vano Eroho Awe khutthikela Ekereja. Nto erutthu Awe yoowelihwiwa khukilaathi Veehiceni va Muluku.

Ehice ya Muluku! Ole ori Veehiceni okhanle Mphuki. Hiyo noosuwela eyo. Ahe, Olamuliwa ori vayi? Atithi aanvaha... Awo khammulamula mutthu. Masi Atithi anvaherenrye olamula wothene Mwaana. Ti siiso Owo okhanly'awe. Ni Ekumi Awe ti Namukuttho Muulupale, okilantho vale n'irutthu Awe yoowo, ntoko mukuttho, wira alapeleke olapa wahu. Amen. Munna, eyo ennikeliha etthu mwa nyuwo.

²⁸⁶ Nwehe, "Owo aakuxale Osuulu w'Abrahamu." Owo aikhalinhe Mutthu. Muluku, owiipaka erutthu eriyari ahu, wira anivuluxe. Mwa moolumo makina, Muluku aikhalinhe etampi, wira hiyo anatampi niire mpantta wa Yoowo. Nto nairaka mpantta wa yoowo, niniira mpantta wa Yawawe... Hiyo naari atthu a okathi nnipuro, miloko mithanu na miili. Nto Muluku khukhuruwa khukhala mmosa a hiyo, miloko mithanu na miili, wa okathi Awe aavaheriw'awe, wira hiyo niire mpantta wa Ekumi Awe Ehinimala. Nto okathi oniyariw'ahu vasya, ninkhala aana alopwana ni aana athiyana a Muluku, ni ninkhalana Ekumi Ehinimala, ni khanimpweteya.

Oh, Moopoli xee—xee—xeeni oottottopeliwa! Oh, khiivo enamuna yo olepa eyo. Khiivo enamuna yo oleliiherya eyo. Eyo eri ottaiwene wo oleliiherya. Khaavo onwerya oleliiherya moota Eyo ery'aya yuulupale. "Muulupale Ti Nyuwo! Muulupale Ti Nyuwo!" ti yoolikana.

Siiso aahaana ailikanyihaka n'axinn'Awe mwa itthu sothene,... (Muupuwele yeeyo)... *wira akhale namukuttho oomoriwa ikharari ni oororomeleya mwa itthu sa Muluku,...* (Nwiriyane ela.) ... *wira aliverye... itampi s'atthu.*

Wira aliverye, vano, Muluku, asuwelaka exariya, aahaana okhala ohixariya, wira oone ele yaari okhala natampi, wira athikele waataaniha, mwaha wo "waataaniha," ni waamorela ikharari atthu.

287 Eversiikulu enttharelana, nwiriyaane Ela va.

Okhala wira mwa yeeyo owo oohaawa . . .

288 Muluku khaakhanle ohaawaka muRohoni. Owo aahaana wiikhaliha erutthu, wira oone owereya w'eretta, wira oone weereriwa wa soopuha, wira oone weereriwa wo otthuna, wira oone weereriwa wo ovoliwa etala, wira oone owerya wo okhwa. Wira akuxe mwa Yoowo wira akhale Ohoolo wa Eroho yuulupale ya Yehova, Eroho, kahi Mutthu; Eroho, wira alapele makhalelo ala. Nto Yesu ookuxa yeeyo, wira alapele mwaha wa hiyo, maana Owo onnisuwela moota enwerye'aya. Mwaawerewaka, Owo onnisuwela moota munoon'anyu. Mweereriwaka, Owo onnisuwela moota munoon'anyu.

289 Vano, mootoko oweha okathi onimuthan'ahu mukhulupale, khula mulimi onimuthanla mukhulupale otonko okhala mulimi, okhala wira owo onnisuwela epantte yoolipa ya makhalelo a mulimi. Munnona? Owo ommutthuna mutthu onsuwela saana.

290 Nto Muluku ahinatthi osuwela saana; Owo ary'ene Owaarya wuulupale. Moota Owo aarow'awe owerya osuwela saana, Owo numala omuhukhumu mutthu? Mwa Owaarya Wawe, Owo aahimuhukhumu mutthu. Nto enamuna emosa paahi Owo aarow'awe osuwela moota wo omukhalaha naxariya mutthu waari wiikhaliha mutthu.

291 Nto Muluku aahimukhuruwela mwali harusi vano owo khuyara erutthu, kahi ephome ya muYuta, nnakhala ephome ya Mmalapo, masi Ephome awe Yoowo Mwaneene. Ephome yoopattuxiwa ya Muluku, woohikhala hata ekhapa, nnakhala, hata otthuna w'ekhapa. Nto Erukuruku ila y'Ephome, yaopattuxiwe mmirimani mwa muthiyan'ola, yaahimuyara Mwaana. Nto okathi Owo opatisiw'awe ni Yohani Mpatisa, Yohani iirale, "Miyo kinnikhalela onamoona, wona Eroho ya Muluku (ntoko epompa) ekhuruwaka khukhala vasulu Vawe."

292 Khivanxankiha Yesu aawery'awe ohimya, wira, "Koovahiwa owerya wothene Wirimu ni vathi mmatatani Mwaka." Muluku ni mutthu yaahikhala Mmosaru. Erimu ni vathi saahipatikhana emosa n'ikhw'aya, ni Owo aari Mmosa paahi onwerya oruuha waataanaha mwaha w'etampi ahu. Mwaha wa yeeyo, mwa Nsina Nawe, onniiraneya openuxiwa. Owo onnisuwela owereiwa wanyu.

293 Mootoko wiiwa nsipo nla, naamukhaani na khalayi?

Yesu onnisuwela owereiwa wanyu, Owo
onniwerya woopola ni openuxa;
Muruuhe muritti anyu w'Apwiya muhiye
weiwo.

Ti yeeyo. Owo onnisuwela.

Erutthu ahu yaawereiwaka, ni ekumi ahu
 khuhinaphwanya,
 Muupuwele paahi Muluku Wirimu onnaakhula
 mavekelo;
 Yesu onnisuwela owereiwa wanyu, Owo
 onniwerya woopola ni openuxa;
 Muruuhe muritti anyu w'Apwiya muhiye
 weiwo.

²⁹⁴ Ti yeeyo tu Owo onvekel'awe, "Muhiye weiwo paahi." Mwaha wa zeeni? Owo ti Namukuttho ahu Muulupale eemenle va, onsuwela moota munoon'anyu. Ni Owo onnisuwela moota wo owaataanihani mutthikelaka mwa mahala, ni moota wo woohokoloxeryani ekumi anyu. Owo onnisuwela yothene eyo; Owo oohaawa. Mwaahikhalane nipuro n'omumula-vo; Owo aahivira memmo. Mwaarina-ene ekuwo emosa paahi yo waakakhanya; Owo aahivira memmo. Mwaatheiwaka, olupatthiwa; Owo aahivira memmo.

²⁹⁵ Nwiriyanane eversiikulu yookiserya vano. Vaareera.

. . . *owo onoowerya waakhaliherya ale aneehereriwa.*

Wala, mwa moolumo makina, Owo onniwerya *waalipiha* ale, *waakhaliherya* ale, waakhaliha ale. . . *waakhupanyerya* yaawo. Okhala wira, Muluku Mwaneene aahiikhaliha mutthu, wira oone yeeyo.

²⁹⁶ Munnuupuwela, ohiyu uwo, khaniixuttihale yeeyo? Moota Muluku aarin'we o. . . Okhwa waahikhalana mpunu, waanoopopiha. "Mahiku aya othene yaari mw'epotthani mwaha *w'okhwa* nno." Vano nto Yesu khurwa, wira Owo akumihe mpunu ule mookhwaani.

Nto okathi Owo aawel'awe mwaako, munnuupuwela moota nooniheny'ahu? Malepa ale makhaani ooxeerya vakuwoni Vawe, nuvira okathi vakhani othene khukhala nlepa nimosu nuulupale, ni naanithela Ephome vaary'awe-vo. Erutthu Awe, yaamukhaani ni yootteettheya, Owo khaawerya otthikela arowaka, vano aahimora. Simoni a oKirene, mulopwana ooriipa, aahimukhaliherya Owo oteexa mwiikimanyo awelaka vamwaako.

Nto okathi amukhomenly'aya Owo vamwiikimanyo, nto Owo aahikhuwela avekelaka maasi. Khula mutthu onvuuva ephome onniphavela maasi.

²⁹⁷ Munnuupuwela okathi waalalenry'aka ohiyu uwo mwaha wa "Etthove, maleka onninlela muro wa maasi, siiso-tho munep'aka onnoohaawelani Nyuwo, O Muluku"? Etthove yavulala-ru masi ery'ene ekumi, eyeheyaka ephome, ehaana okela mmaasini ahiiso enimookhwa.

²⁹⁸ Miyo kaahoopeliwa, omatta, okathi warin'aka miyaakha muloko ni mixexe. Nto kampaathale vale. Metto saka

saahiphuleya mwa miyo, ntoko enama yooxiliwa, mwaha w'ekapwitthi emosa ya munnuwelo 12. Nto kaanikhuwela kivekaka maasi, "Oh, kivaheni maasi!" Kaahikwha nantiirya; iyano saka saahikwha nantiirya.

²⁹⁹ Mpatthani aka khutthimakela vantthiyani, naarina mithinto sothene s'anaarookhinya, naari nntapo. Nkaacala yaari exeeni. Nto owo khusariha maasi, vano miyo khwaathamihya eyano aka, vano owo khuwama exapheyo awe *siiso*, mwaano mwaka. Ayo, kaahaana okhalana maasi.

³⁰⁰ Owo aavuuya ephome. Owo khwira, "Kivaheni maasi." Vano awo yaahinvaha Owo evinaakiri vanttapwattani, nto Owo khukhootta, khuhitthuna. Owo aari Mwapwittipwitthi a Muluku aakhwa voopuroni vahu, wira aruuhe waataana wa mutthu. Yaari exeeni iyo? Muluku a Wirimu.

³⁰¹ Billy Sunday ootoko ohimya, wira, "Khula mwiri waahikhalana Malaikha yeemenle memmo, yiiraka, 'Mookole ntata Nanyu paahi muthoonye n'ikatha Anyu, Hiyo nnoorukunxa yookhumelela ela.'"


³⁰² Nikhuru nle noolakanya n'anatiini oothipelela, yihaniwa atthu aalupale oosoma oosuwela a D.D., Ph.D., yaahimwaattamela Owo khwira, "Vano, mwaari Mwaana a Muluku! Weyo woowoopola akina; khonwerya wiisooopola mmansawo. Okhuruwe vamwiikimanyo, nto ninoowaamini."

³⁰³ Awo khiyaasuwela wira yammuttottopela Owo. Owo aaniwerya wiisooopola Mmansawe. Masi vaakhanle wira Owo aahiisooopola, akina Owo khaarowa owerya owoopola. Tivo, Owo aahiivaha Mmansawe. Nttottopeliwe Nsina Nawe. Owo ohiivaha Mmansawe, wira kiwerye woopowa ni nyuwo nwerye woopowa. Oh, ophenta xeeni ohiniphimeya!

³⁰⁴ Owo khaarina owereiwa. Erutthu ile yooreerexa yooyariwa ni harusiki khiyaarina owereiwa. Masi Owo aahikhala oowereiwa, wira asuwele mooto wo okilapelela miyo okathi waawereiw'aka.

³⁰⁵ Owo khaarina okhulumuwa, masi Owo aahikhulumuwa. Koosoma ehantisi emosa yaamukhaani ya yeeyo okathi mmosa, nkisuwenle sinto yaari y'ekeekhai wala nnari. "Okathi aamuhihimuxaly'awe mookhwani, mmirav'ole a oNayini iwe, Owo aahikilaathi vamwala aahiipulela mwaha wo owereiwa muru," okhala wira Owo aahaana okuxa iretta sahu.

³⁰⁶ Owo aahaana okuxa etampi ahu, nto iwe Owo aahikhwa, ni oKalvario okathi enwi ile ni okhwa waakelinh'aya mpunu aya. Khula mutthu onnisuwela, okathi enwi enkelih'aya mpunu aya, khenwerya-tho oluma. Enwi yaavavaka wala khula mwaaxiitthu onluma, akeliharu mpunu awe, onoompweteya mpunu awe. Eyo nlelo enwi masi kherina mpunu. Etthu emosa paahi ekhanly'aya wiiraka wunla ni onyakula vanci-ene.

³⁰⁷ Eyo t'itthu ene emosa okhwa onwery'aya omwiiriha mulipa-oowaamini, onyakula vanci-ene paahi. Masi aleluya, nttottopeliwe Nsina n'Apwiya, Awo aakhaliha mpunu ule wa mookhwaani mw'erutthuni mwAya. Emanuweli ohiira. Khuhihimuwa, mmurotoni mwaya, khutatha mpunu uwo nto ohiy'ula t'Ohikhwa. Ni Eroho Awe eri mpaani mu, ni Owo onniisooniherya Mwaneene mukumi eriyari ahu. Owo ti Mesiy'ahu. Owo ti Moopoli ahu oottottopeliwa. 

AHEPERI, EKAPITULU YA NENLI 3 EMK57-0828

(Hebrews, Chapter Two ³)

ITTHARANELO YA ELIIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yeetaka 28 mweeri w'Agosto, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org